



Allahova ljubav prema vjerniku – uzroci i znakovi (Meka)

Hatib: dr. Bender ibn Abdulaziz Belile

13. zulkade 1444. po Hidžri / 2. juni 2023.

Hvala Allahu, Koji Svojom dobrotom, učvršćuje korake onih koji idu Pravim putem, i Koji Svojom blagošću, upućuje srca zbunjenih i neodlučnih.

Njemu pripada najvrednija, najuzvišenija, najčišća, najljepša i najblagoslovljenija zahvalnost i hvala. On je Blagodarni, Njegovo davanje je obilno i dostupno.

Svjedočim da nema boga osim Allaha, jedinog, Koji nema druga, Vladara, Istinitog, i svjedočim da je Muhammed, sallallahu alejhi ve sellem, Njegov rob i poslanik, predvodnik bogobojaznih i prvak onih koji će se na Sudnjem danu prepoznati po tragovima abdesta. Neka su na njega Allahova milost, blagoslov i mir, i na njegovu čistu porodicu, iskrene ashabe, tabiine i sve one koji ih slijede u dobročinstvu do Sudnjeg dana.

O ljudi, oporučujem sebi i vama bogobojaznost, ona je najbolja zaštita i najljepša odjeća.

“O vjernici, bojte se Allaha i budite s onima koji su iskreni!” (Et-Tevba, 119)

O vjernici, najveći cilj i želja svakog vjernika jeste da zadobije Allahovu ljubav, jer je to ljubav Stvoritelja, Vladara, Uzvišenog i Onoga u Čijoj je ruci njegova korist i šteta, život i smrt, neovisnost i zadovoljstvo.

Za postizanje ovog uzvišenog cilja postoje putevi i uzroci, a prvi i najvažniji je čvrsto vjerovanje u Njega.

Sve što je čovjekov iman čvršći i jači, Allahova ljubav prema njemu je veća.

Iman se postiže srcem, jezikom i tijelom.

Iman srca je čvrsto vjerovanje da je Allah istina, i u ono što je obaveza prema Njemu, Njegovo priznanje i predanost Njemu.





Iman jezika je izgovaranje riječi tevhida – la ilahe illallah – nema boga koji je dostojan obožavanja osim Allaha.

Iman tijela je činjenje dobrih djela.

Drugi uzrok Allahove ljubavi prema čovjeku je slijeđenje vjerovjesnika Muhammeda, sallallahu alejhi ve sellem, i prihvatanje, dragim srcem, onoga s čime je došao, postupanje u skladu s njegovim sunnetom i distanciranje od onoga što mu proturječi.

Uzvišeni kaže: "Reci: 'Ako Allaha volite, mene slijedite, i vas će Allah voljeti i grijehe vam oprostiti!' A Allah prašta i samilostan je." (Ali Imran, 31)

Ko bude slijedio Poslanika, sallallahu alejhi ve sellem, Allah će ga voljeti, oprostiti mu grijehe, smilovat mu se, bit će mu podrška u mirovanju i kretanju.

Treći uzrok je približavanje Allahu činjenjem pobožnih djela, farzova, vadžiba i nafilu.

U hadisi-kudsijju, Uzvišeni Allah kaže: "Najdraže čime Mi se Moj rob može približiti jest ono što sam mu propisao. Moj će Mi se rob ustrajno približavati nafilama pa ću ga zavoljeti, a kada ga zavolim, postat ću sluh njegov kojim sluša, vid njegov kojim gleda, njegova ruka kojom radi, njegova noga kojom hoda. Ako Me upita, dat ću mu, a ako od Mene zaštitu zatraži, doista ću mu je pružiti."

"Glava" pobožnih djela, Allah vas čuvao, je namaz, uzvišeni farz, ibadet ispred svih ibadeta, radost vjernikovih očiju, utjeha duša bogobožnih i odmor duša pobožnih.

Abdullah ibn Mesud, radijallahu anhu, rekao je: "Upitao sam Vjerovjesnika, sallallahu alejhi ve sellem: 'Koje je djelo najdraže Allahu?', a on je rekao: 'Namaz u njegovo vrijeme.'" (Buhari i Muslim)

Blago se onome ko ga bude obavljao na propisan način i u propisano vrijeme, a teško onome ko ga zapostavi i bude nemaran prema njemu.

Allahu moj, molimo Te da nam podariš Svoju ljubav, i ljubav onih koji Tebe vole i ljubav prema svakom djelu koje nas približava Tvojim ljubavi, i podari nam blagoslov u Kur'anu i sunnetu, i okoristi nas njihovim ajetima i mudrošću.





O muslimani, kada Allah zavoli roba, On mu podari lijep prijem i omili ga u srcima stanovnika nebesa i Zemlje.

Vjerovjesnik, sallallahu alejhi ve sellem, rekao je: "Kada Allah zavoli nekog Svoga roba, pozove meleka Džibrila, alejhis-salam, i kaže mu: 'Ja volim tog i tog Svoga roba, pa ga i ti zavoli!', i Džibril ga zavoli. Potom Džibril pozove stanovnike nebesa (meleke) i kaže im: 'Allah voli tog i tog Svoga roba, pa ga i vi volite!', i oni ga zavole. Zatim se ta ljubav spusti i na Zemlju i takav čovjek bude prihvaćen kod ljudi." (Buhari i Muslim)

Koliko je samo važno da činimo uzroke zbog kojih će nas Allah zavoljeti, i tako postignemo posebnu počast i postanemo od Njegovih bliskih robova.

"I neka se ničega ne boje i ni za čim neka ne tuguju Allahovi štićenici, oni koji budu vjerovali i koji se budu Allaha bojali, za njih su dobre vijesti i na ovome i na onome svijetu – Allahove riječi niko ne može izmijeniti – to će, zaista, velik uspjeh biti." (Junus, 62–64)

Znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Molim Allaha da i meni i vama podari blagoslov u časnom Kur'anu, i da podari da nam koriste njegovi ajeti i mudra opomena. Rekoh ovo i od Uzvišenog Allaha tražim oprost za sebe, za vas i sve muslimane od svakog grijeha, a tražite i vi, On mnogo prašta i On je milostiv.

